

Tafla 2: Meðal þyrpingafjöldi við rannsóknir á yfirborðsmengun

	Viðunandi	Ófullnægjandi
Heildargerlafjöldi (TVC)	0 – 10 /cm ²	> 10 /cm ²
Enenterobacteriaceae	0 – 1/ cm ²	< 1 /cm ²

H) Eftirfylgni.

Tilkynna skal niðurstöður rannsókna stjórnendum eins fljótt og kostur er. Nýta skal niðurstöðurnar til þess að viðhalda og bæta gæði þrifa og sótthreinsunar. Ef niðurstöður eru óviðunandi þarf að komast að ástæðum í samráði við hreingerningarfólk. Tekið skal á eftirfarandi atriðum:

1. Skorti á eða ófullnægjandi þjálfun og/eða leiðbeiningum.
2. Notkun rangra hreinsi- og sótthreinsiefna.
3. Ófullnægjandi viðhaldi á áhöldum til þrifa.
4. Lélegri verkstjórn.

SKIPULAGSSKRÁ

Sjóðs Sigríðar Lárusdóttur.

1. gr.

Sjóðurinn heitir Sjóður Sigríðar Lárusdóttur. Hann er stofnaður 27. ágúst 2003 af Sigríði Lárusdóttur fæddri 5. maí 1918, kt. 050518-3889, til minningar um þá einstaklinga sem hafa átt um sárt að binda vegna meðfæddra sjúkdóma í mjöðm.

Heimili og varnarþing sjóðsins er í Reykjavík.

Sjóðurinn er í umsjá Styrktarsjóða Háskóla Íslands, og fellur undir sjóði sem lúta yfirstjórn Háskóla Íslands.

2. gr.

Tilgangur sjóðsins er að efla rannsóknir á sviði bæklunarlækninga. Sérstök áhersla er lögð á rannsóknir á meðfæddum göllum í mjaðmalið svo sem ættgengi þeirra, tíðni og afleiðingum. Veita má styrki til fyrirlestrahalds eftir því sem sjóðstjórnin telur ástæður til.

Tilgangi er framfylgt með því að veita styrki til verkefna sem rúmast innan þess ramma sem ákvæði skipulagskrárinnar setja.

3. gr.

Stofnframlag sjóðsins er eftirfarandi:

1. Framlag Sigríðar að fjárhæð 500.000 krónur.
2. Hluti af söluverði íbúðar Sigríðar að Hjallabraut 33 í Hafnarfirði, þegar hún verður seld.
3. Erfðaskrá Sigríðar Lárusdóttur, samkvæmt nánari fyrirmælum sem þar koma fram.
4. Gjóf frá Dalaætt að fjárhæð 300.000 krónur.

Stofnframlag er óskerðanlegt.

Tekjur sjóðsins eru eftirfarandi:

1. Vextir og arður af eignum sjóðsins.
2. Fé og annað verðmæti sem safnast í nafni sjóðsins.

Sjóðinn skal ávaxta á hagkvæmastan hátt á hverjum tíma og í regnhlífarsjóði Styrktarsjóða Háskóla Íslands.

Heimilt er að úthluta allt að tveimur þriðju af ávöxtun hvers tímabils, að teknu tilliti til verðlagsbreytinga. Þriðjungur ávöxtunar leggst við stofnfé og verður hluti af bundnum höfudstól, sem óheimilt er að úthluta.

Reikningsár sjóðsins skal vera almanaksárið. Reikningar sjóðsins skulu endurskoðaðir af endurskoðanda Styrktarsjóða Háskóla Íslands og þeir birtir með sama hætti og aðrir reikningar Styrktarsjóða Háskóla Íslands.

4. gr.

Sjóðnum skal skipuð sérstök sjóðstjórn sem kemur saman að minnsta kosti árlega. Hún skal skipuð þremur fulltrúum. Einn fulltrúi er skipaður af rektor Háskóla Íslands en meðan Sigríður er á lífi og hefur andlega getu til skipar hún tvo fulltrúa í stjórnina og skulu þeir sitja svo lengi sem þeir hafa vilja til. Eftir andlát Sigríðar og þegar fulltrúar hennar láta af störfum skal sjóðstjórn skipuð til tveggja ára í senn, þar sem rektor skipar einn fulltrúa, bæklunarlækningasvið Landspítala háskólasjúkrahúss einn fulltrúa og barnalækningasvið læknaeildar Háskóla Íslands einn fulltrúa.

Hlutverk sjóðstjórnar er að annast úthlutun styrkja. Sjóðstjórn ber að halda formlega fundargerðarbók um starf sitt og afriti fundargerða skal skila til Styrktarsjóða Háskóla Íslands. Stjórn setur sér nánari starfsreglur um úthlutanir svo sem um umsóknarfresti og ferli umsókna. Stjórnarstörf eru ólaunuð.

5. gr.

Fyrsta úthlutun fer fram eigi fyrr en einu ári eftir að fé frá sölu íbúðarinnar að Hjalla- braut hefur verið lagt til sjóðsins. Að öllu jöfnu skal úthluta styrk árlega, á afmælisdegi Sigríðar 5. maí en sjóðstjórn getur þó ákveðið að safna saman leyfilegri úthlutun milli reikningsára og úthluta í einu lagi. Heildarfjárhæð styrkja er þó aldrei hærri en sem nemur lausum höfudstól samkvæmt uppgjöri.

6. gr.

Verði sjóðurinn lagður niður renna fjármunir hans til málefna tengdum tilgangi sjóðsins.

Ekki er hægt að leggja sjóðinn niður af öðrum ástæðum en kveðið er á um í lögum og ekki án þess að sjóðstjórn og rektor Háskóla Íslands séu einhuga um þá ákvörðun.

7. gr.

Um starfsemi sjóðsins fer eftir því sem segir í lögum nr. 19/1988 um sjóði og stofnanir sem starfa samkvæmt staðfestri skipulagsskrá.

Staðfestingar dómsmálaráðherra skal leitað á skipulagsskrá þessari og breytingum sem kunna að verða gerðar á henni.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 24. september 2003.

F. h. r.
Drífa Pálsdóttir.

Bryndís Helgadóttir.